

P-80
26642
ШКОЛЬНИКЛОН БИБЛИОТЕКА



Яков Рочев

СУРОВОЙ ШКОЛА

КОМИ КНИЖНОЙ ИЗДАТЕЛЬСТВО

1959

ШКОЛЬНИКЛОН БИБЛИОТЕКА

Яков Рочев

СУРОВОЙ ШКОЛА

26642

БИБЛИОТЕКА
Респ. Краев. Музея
Коми АССР
город Сыктывкар.

КОМИ КНИЖНОЙ ИЗДАТЕЛЬСТВО
Сыктывкар 1959



АС ИЫЛЫСЬ

Ме чужлі 1909 вося январь 23-өд лунö Ухтинскöй районса Усть-Ухта сиктын, крестьянин семьяын. Дас нель чоя-вокаысь быдмылім дасөн, на лыдын ме — медся ичöt бöрын мөд. Дас квайт арöсөн удайтчис пырны велöдчыны Мохчаса II ступеня школаö.

Гортын велöдчигөн на миян сиктын котыртчис пионерскöй организация. Менö бöрйисны вожатöйö. 1925 вося Май 1-өд лунö миянös, кымынкö мортös, кызди медбур пионеръясös, парад дырйи примитисны комсомолö.

Мохчаса II ступеня школаын велöдчигөн вит во чöж вöлі школьнöй стенгазетаын редколлегияса член-өн, куим во уджалі комсомольскöй организацияса секретарөн, öти во школьнöй исполнительнöй комитетса председателён.

1930 воын II ступеня школа помалөм бöрын öти во велöдi Абезь сиктса одноконплексионнöй начальнöй школаын, сэсса босьтисны Ижемскöй роноса инспекторөн, а недыр мысти сэтысь вуджöдисны «Гöрд Печора» газет редакцияö ответственной секретарөн. Роннын да редакцияын уджалигөн кык во чöж вöлі ВЛКСМ райком бюроса членөн.

1933 воын пыри велöдчыны Коми государственнöй педагогическöй институтö. Танi литературнöй факультетын нель во велöдчигөн сiдзжö ковмыліс унакодь нунны общественнöй удж: во-мөд вöлі факультетса комсоргөн да институтскöй комсомольскöй комитетса член-өн, пöшти нельнан во чöжыс уджалі общеинститутскöй стенгазета да рукописнöй журнал «Том вын» редколлегиясса членөн.

Институт помалом бõрын õти во велõдi Тентюков-
скõй среднõй школаын коми да роч кывъяс.

1938 восянь дас вит во чõж уджалi Коми книжнõй
издательствоын редакторõн.

Гижны заводитi среднõй школаын велõдчигõн на.
1942 воын петалис стихотворениеяслõн сборник.
1951 воын петис торъя книгаõн «Кык друг» роман,
1959 воын — «Изва гызьõ». Таысь кындзи, вуджõдi
коми кыв вылõ уна книга, на лыдын: Л. Толстойлõн
«Хаджи Мурат» да «Казакъяс», А. Чеховлõн «Рас-
сказъяс», Б. Полевойлõн «Настõящõй морт йылысь
повесть», И. Ликстановлõн «Малышок» да мукõд.

«Суровõй школа» — «Кык друг» романлõн перера-
ботайтõм вариантысь отрывокъяс.



Геня Дуркин велөдчыны пырис сёрөн. Кор сыкөд тшөтшъяяс мунисны школаө, сійө висис скарлатинаөн. Мөд онас, челядькөд ворсигөн, дойдис коксө да квайт вежон эз чеччыв вольпасысь. Кык во коли прөста. Тшөтшъяяс лөсьөдчисны мунны коймөд классө, а сійө мөвпалис велөдчыны заводитөм йылысь. Вот и талун садьмөмкөд тшөтш бара долис аслыс:

— Со и ар воис. Регыд муна школаө... Мам вурас меным выль дөрөм. Школаын сетасны книгаяс, тетрадьяс...

Дзуркнитчис керка өдзөс. Пөдөнчаөн пырис лыстысян паськөма мамыс. Сійө казялис пиыслысь садьмөмсө да меліа шуис:

— Чеччы, пиук! Серуктө колльөд. Арьявылыс дзикөдз дышөдчыны кутіс мунны горт дінысь.

— А выль дөрөмсө вуран?— юрсө лэптіс Геня.

— Вура, мада¹ пи, вура,— пөдөнчасө пуктіс мамыс.— Мун колльөд регыдджык.

¹ *Мада* — муса (ижемскөй диалектын).

Геня чеччис, локань весьтын ошалысь жоч руко-
мойникысь мыссис, домасось ситеч дөрөм вывти воня-
сис гөрд воньон, кудриа еджгов юрсия юрө шапкаалис
батыслысь вөралан шапкасо и мунис колльодны мөс-
нысө.

Кузь му дорын Серук отувтчис мукөд мөсьяс дорө,
юрсө бергөдис сиктлань, кыкысь гораа бакөстис, а
сэсся, тугья бөжнас отар-мөдар бокө гоз-мөдысь
шлапнитөм бөрын, стадакөд дышпырысь мөдөдчис
потшөсьяс пөлөн видз вылө.

Син вылө лэдзыштөм шапкаа Геня дыр сулалис.
Кор мөс чукөр саяли мыльк сайо, вөсни кузь ньөрийөн
өвтчигтыр, сийо думыштчөмөн вөсьлалис гортлань.

Шор вомын кылис марөдчөм. Геня сувтис да мөдис
видзөдны. Син улө уси ваын келалысь детинка. Сийо
бедьторийөн кучкалис вао да горөдлывлис:

— Ко-о-о!.. Ко-о-о!.. Ко-о-о!..

Геня дыр видзөдис перилө вылө лэдзчысьөмөн,
сэсся лэччис шор вомө, мышладорсянь матыстчис
виж төбөка¹ детинка дорө да юалис:

— Мый вөчан?

Төдтөм детинка дрөгнитис, лэптис юрсө да, пов-
зьөмысла польдчөм гөрд чужөма, векни съод синъяс-
нас лапйөдлгитыр, мөдис сюся видзөдны Геня вылө.

— Мый, мися, вөчан?— выльысь юалис Геня.

— Йөрася²,— синъяссө лэдзис төдтөм детинка.

— Кыдзи йөрасян?— эз гөгөрво Геня.

— Да сидзи... йөрася,— збойджыка нин шуис төд-
төм детинка.

Геня нинөм эз гөгөрво, но ёнасө эз и зиль гөгөр-
воны. Отитор интересуйтис сийөс: кодi кытысь тайо
лөсталысь съод юрсия, векныдик синъяса, гырысь
черлыяса детинкаыс?

¹ Төбөк — көр куысь вурөм көм.

² Йөрасьны — арканьясысь вөчөм йөрө көрьясөс йөртавы.

Найö, чöv ланьтöмөн, мыйкö дыра видзöдiсны öта-мöд вылö, сэссия Геия юалис:

— Тэ кытысь?

— Көрдорысь,— вочавидзис тöдтöм детинка.

— Көрдорысь?!— шензис Геия.— А мыйла тани?

— Велöдчыны вайисны.

— Велöдчыны?— Геия пыр жö ловзис.— Ме таво велöдчыны жö кута. Тöдан, кöни миян школаыс?

— Ме сöмын на вои...

— Со мыльк йылас кык судта керкаыс.— Геия индiс кинас школалань.— Ми тöрыт ветлим... Куим лун мысти корисны. А тэныд кымын ар?

— Дасöд.

— Дасöд? А меным вежон мысти дас ар тырö! Кыдзи тэнö шуöны?

— Васьö Манзадей.

— Абу Васьö, а Василей... Школаад тадзи колö шуны!— юрнас гогнитiс Геия да юалис:— Ненец али мый?

— Батьöй тай сiдзи шуис-а...

— Бать-мамыдэмось?

— Батьöй Исак купечлы пастукалö.

— А менам бать көнкö уна вояс нин салда тын,— шуис Геия да

довкнитiс юрнас:— Мунам сиктас!

— Мунам,— шуис Вася, и найö Геия Дуркинкöд, кыдзи бур тöдсаяс, сёрнитiгтырйи осьлалiсны кыр йивтi.

Коми мулөн войвылын ненец-батракъяс нэмъяс



чөж олісны да уджалісны комияскөд өтсөр, та вöсна төдісны не сөмын налысь оласногсө, но и кывсө.

* * *

Сьөкыд вөвлі олөм-вылөмыс көр видзысь пастукьяслөн помтөм-дортөм тундраын. Найө ичөтысянь төдлісны сөмын сьөкыд удж. Школаяс сәні некор эз вөвлыны. Тані олысь челядь кывлывлісны велөдчөм йылысь сөмын йөзкостса сёрниясысь. Ковмас кө велөдны челядьөс — мөдөд найөс уна сө верст сайө. Та вылө колө деньга, көм-пась. Батрак-пастукьяслөн йөзө петан көм-пасыыс эз вөвлы дай деньгаыс эз зельөдчыв зепьясын.

Вася Манзадей вөлі бать-мамыслөн өтка пи. А өтка пи вöсна кызкө пыр ёнджыка төждысьөны. Мый чөскыдджык — пилы, мый лөсьыдджык — пилы. Асланыс пинь костысь перьясны, а вичмөдасны пилы. Васялөн батыыс, Семён Манзадей, аслас нәм чөжыс төдмавліс сөмын кык буква — «С» да «М». Ковмывліс кө көрьясөс пасйыны либө кутшөмкө бумага вылө кырымпас пуктыны, век пуктывліс «СМ». Школаын велөдчыны сылы эз удайтчыв. Батыслөн, Олексей Манзадейлөн, вөлі көр сө кымын, но сійө найөс ворссис картіөн Тельвискаса купечьяслы. Семён та йылысь, кыззи висьтавліс пиыслы, помнитіс вөтөн моз. Сылы пө сәки вөлі ар квайт-сизим. Батыыс мукөд пастукьяскөд муніс праздничайтны Тельвискаө. Рытнас чомйө бөр эз лок. Эз лок сійө и мөд луннас.

Сөмын коймөд луннас Семёнлөн батыыс подөн воис чомйө. Чужөмыс вөлі арся лун кодь букыд. Бөрынджык тыдовтчис, мый сійөс праздник лун кузя сэтчөс купечьяс юкталөмаөсь. Код юрнад сійө пуксьөма картіасыны. Ворсөма войбыд. Асьядорыс код юра Олешка ворссьөма медбөрья саямкасө¹, сәсся маличасө... Гөтыр дінас локтөма йөз паськөмөн.

¹ Саямка — упряж.

Та бõрын Ӗлешка Манзадей медасьõма батракõ да асшõра олõм абу нин тõдлõма.

Васялõн батыс, Семён Манзадей, сідзжõ том бур кадсõ пастукаліс Изьваса да Из сайса кõр видзысь купечьяслы. Велõдчõм йылысь нинõм и вõлі думайтны.

Бõръя кадõ Семён уджаліс кõр видзысь пастукõн Изьваса купеч Исак стадаын. Тані и чужис сылõн пиыс, батыслõн кодъ жõ ляпкыдик паськыд ныра, гырысь черлыяса Вася. Пи чужõм бõрын Семён гозъя став вын пуктісны, медым бура быдтыны да школаын велõдны дитянысõ.

Воис школаõ пыран кад. Бать-мамыс ещõ воддза арнас на заводитісны лõсьõдчыны пинысõ сиктõ мõдõдігкежлõ. Тõвнас вурисны сылы пась-кõм. Мукõд дырйи та вõсна кольччывлісны джын пõtлунõн.

Гожõм помнас Васяõс батыс кõр дадь вылын петкõдіс Адзва юдорса пõчинокõ. Сэсянь сійõ тõдса йõзкõд писõ мõдõдіс пыжõн Макла сиктõ.

Уна лун ковмис детинкалы кывтны яй кылõдысь-яскõд. Уна ном да гебõс Вася Манзадей чõсмõдіс тайõ кузь туй чõжыс.

Ӗти мича арся асылõ, школаын велõдны заводитõм водзвылын, сійõс вайисны Макла сиктõ. Со и тõдмасис сійõ Геня Дуркинкõд. Первой лунсянь жõ найõ лоины бур другъясõн. И медводдза асылõ школаõ мунõм бõрын, кор Вася эз сяммы шуны учительлы ассыс арлыдсõ, сы пыдди збоя вочавидзис Геня:

— Вася Манзадей! Дасõд вылын.

Тадзи заводитчис школаын велõдчõм.

* * *

Аслас визулõн визувтіс кад. Еджыд эшкынõн шебрасис му. Лым шапкаõн шапкаасисны туй õтар-мõдар бокõ лажыньтчõм керкаяс: ар бõрын локтіс тõв. Детинкаяс велõдчисны. Найõ эз тõдлыны, кызди

кадыс кусыньтіс тулыслань. Лунъяс тӧдчымӧн со-
дісны.

Быд асыв Вася пыравліс Геня ордӧ да сэсянь,
фанера пӧвйысь вӧчӧм сумка боканыс ӧшӧдӧмӧн, найӧ
варовитігтыр ӧтлаын мунлісны школаӧ.

Ӧтчыд Вася сідз жӧ локтіс Геня ордӧ. Школаӧ
мунтӧдз найӧ дыр пукалісны зарни ӧгырӧн ымралысь
пач дорын. Вася висьтасис кӧр видзысьяслӧн олӧм
йылысь. Сэсся Геня аслас сумкаӧ суйис небыд пӧсь
пирӧгъяс, да найӧ тэрмасьтӧг мӧдӧдчисны школаӧ.

Геня дінын Вася асьсӧ кутліс кызкӧ прӧстӧя.
Школаын, челядь пӧвстын, сійӧ лолі дзик мӧд кодӧн:
дурны-котравны мукӧдъяс моз эз сяммыв. Кӧр ви-
дзысьяслӧн чомйын олігӧн сійӧ велаліс ӧтнасӧн кад
колявны и ӧнӧдз эз велав челядь дінӧ. Классын сійӧс
ӧткымынъяс кедзовтісны. Мукӧд дырйи явӧ ворслісны
сылӧн полӧм вылын. Торъя нин радейтісны тешит-
чыны озыр йӧзлӧн челядь.

Вот и талун артмис сідз жӧ. Мефодь Мишка, ку-
печлӧн пи, асывбыд вӧтлысис Вася бӧрся, лыйліс
кирпич торъясӧн да дэльӧдіс:

— Яран! Съӧд юр... Яран!..

Лоис звӧнок. Челядь пуксялісны партаяс сайӧ.
Асья шумыс лӧнныштіс. Медводдза урокыс вӧлі поп-
лӧн. Кольӧм раз сійӧ сетіс задание — талун кежлӧ
гортын велӧдны «Отче наш».

Велӧдчысьяс виччысисны классӧ поплысь пырӧм.
Кодскорӧ шӧпкӧдісны: «Отче наш...» Кывъясыс вӧ-
ліны гӧгӧрвотӧмӧсь, мед жӧ эськӧ оз вун... Мукӧдыс-
лӧн лыддӧма сёысь. Кажитчӧ, ставыс тӧдса, а вот
оз-оз да и бара кутшӧмкӧ кыв кытчӧкӧ вошас. Синъяс
куньӧмӧн зільӧны вайӧдны паметӧ вошӧм кывсӧ:
беда лоӧ, оз кӧ кутны поп юасигӧн сюрласьны колана
кывъяс. Милӧстьтӧм батюшкоысь бурӧн он мын!

Сӧмын Самколы, Мишкалы да ещӧ кымынкӧ озыр
челядьлы эз сюрлыв попсянь. Мукӧдъяссӧ быд лун

кодöскö да кодöскö сійö «гöститöдліс» линейкаөн либö кыз книгаөн. Дыгыдджыкъяслөн юрысь эз и бырлыв йöгыс.

Челядь лантьісны.

Надзöникөн воссис учительскöй öдзöс. Сэні мыччысис поплөн гöрд кудель кодь ус-тошкыс да юрсиыс. Отеч Саватий вöлі мератöм кузь тушаа, та вöсна быд пыриг-петігөн сылы ковмыліс кусыньтчыны мегырö.

Геня тувкис Васялы:

— Лев-зверь мыччысис.

Вася гусьöникөн гогнитіс юрнас да шпыньмуніс.

Öдзöс сайысь поплөн став тушаөн мыччысигкості челядь öтитöг удитісны сувтны кок йылö.

— Молитва сывны,— нурбыльтіс поп.

Челядь бергöдчисны пельöслань, көні öшалісны öбразьяс, да горöдісны сывны водзвыв велöдöм молитва «Спаси, господи!»

Ссылöм помасис. Велöдчысьяс пуксялісны. Классын бара лои чöв-лөнъ.

Геня да Вася пукалісны класснöй дöскасянь коймöд партаын. На бөрладорын, нельöд парта саяс, пукалісны купеч пиян — Мефодь Мишка да Ванюк

Самко. Школаö Самко некор эз воływ запастöг. Сумкаын сійö век вайліс кык-куим кусök пуöм яй. Сöмын на заводитчас урок да учитель вешьяс парта дорысь,— сійö баранин вильöдö лы, пиньяснас пон моз нетшкö яйсö.



Самко вильöдчис. Поп бергаліс мöдар пельöсын «старшöйяс» дорын. Геня босьтчис ещö öтиысь лыддыны молитвасö, абу-ö вунöмаöсь кывьясыс. Синсö читкыртöмөн да плешсö көрöмөн детинка шытöг лыддис: «Отцenas иже иси, да сватитса име твоё...»

.. Вася, гырдыда помон парта выло лэдчысьомон, пукаліс ськөд орччон, синсө новлөдліс кузь пөдрасника поп бөрся да мөвпаліс:

«Баба сарапан кодь... Дзик коклябөрөдзыс... Кыдзи эськө төдмавны, гача али гачтөм отеч Саватийыс?»

Васялысь мөвпсө орөдіс Самко, Сійө перйис яй ку-сөкысь лытор да пуктіс Васялы юр вылас, а Мефодь Мишка вашнитіс:

— Яран, вильөд!..

Өбидайсла Васялөн чепөсийис синваыс, но шунынинөм эз шу, а Геня пельпом вывтыс видзөдліс бөрладорын пукалысьяс выло да пинь пырыс сөдзөдіс:

— Ад горш!

Буретш сэки на дінө воис отеч Саватий, пызан вылысь босьтіс кузь линейка, прөйдитчис өшинь дорөдз, сувтіс Геняяс парта дорө да скөрысь шыасис:

— Дуркин Геннадий! Лыдды наизусть «Отче наш!»

Геня сэтшөма повзис, мый плеш вылас чепөсийис пөсьыс. Недыр мысти сійө мыкталігтыр заводитіс:

— Отшшенаш иже иси на небеса да сватитса...

— Мы-ый?— синъяссө сувтөдіс поп.

Геня видзөдіс джоджө.

— Вылысь лыдды, бөлбан!— скөрысла сибдөм гөлөсөн шуис поп.

Генялөн гөрддзасис гөлөсыс, но мырдысьөн заводитіс вылысь лыддыны:

— Отшшенаш ижеиси на небиси да сват птитса...

— Птитса, птитса,— зыр кодь тошсө пыркөдігтыр детинкаөс лёкысь нерис поп, сэсся векуштчис да линейканас лөсыштис Генялы юрас:— Пуксы, бөлбан!..

Геня пуксис, кияснас тупкис чужөмсө да сыркья-лөмөн бөрдіс. Сылы эз вөв гөгөрвоана, мыйысь та-дзисө нөйтисны. Детинка бөрдіс не сы мында доймө-мысла, мыйта забеднөысла. Кутцөм мыжысь нөй-

тісны сійӧс? Ӧд сійӧ став сьӧлӧмсянь зілис, рытнас. некымын пӧв лыддис, асывнас весиг ошйысис Ваялы: «Юалас кӧ — бӧрӧн и водзӧн лыддя!» Вот и лыддис... Детинка бӧрдіс кыз синваӧн.

Поп бара муніс бӧрса партаяс дорӧ. Геня дугдіс бӧрдны, но пукаліс юрсӧ парта вылӧ лэдзӧмӧн, думайтіс:

«Ок, сюрлӧ кӧ, таысь прамӧя жӧ водзӧс мынта...»

Классын выльысь пуксис чӧвлун. Самко бара лы вильӧдіс, а вильӧдсьӧм бӧрас нюжӧдчыліс да кулак ыджадыс лысӧ пуктіс Генялы сьылі вылас.

Геня скӧрысла пузис, чеччис, кватитіс лысӧ да камгис Самколы кымӧсас. Сійӧ лёкысь горӧдіс да кутчысис юрас, и пыр жӧ ки кузяыс кутіс визувтны вир.

Классын кыптіс шум. Тышкасянінӧ локтіс поп, кватитіс Геняӧс пельӧдыс, кычиӧс моз ләптіс, сәсся классысь тойлаліс ывлаӧ да джуджыд кильчӧ вывсынь йӧткыштіс чорзьӧм лым толаӧ. Геня юрнас зутшыкысис войтваӧн артмӧдӧм йи коркаас, вирӧдз дойдіс кӧсичасӧ да пельсӧ.

* * *

Небесаянь киняліс-усис гӧн кодь небыд лым. Му вылӧ водалісны еджыд бобувьяс кодь паськыд лым корьяс. Геня пырис школа посводзӧ. Кӧдзыдысла босьтіс йирмӧг. Вирӧсь пельсӧ кинас тупкӧмӧн детинка дыр сыркьяліс-бӧрдіс, сәсся мӧдӧдчис гортӧ. Довгис туй кузя и, кажитчӧ, водзӧ эз мун. Кокьясыс талун вӧліны сәтшӧм сьӧкыдӧсь, быттьӧкӧ найӧс вӧчӧма свинеч брусьясысь.



Асланыс өшинь улö воём бöрын керкаысь Геня кыліс мужскöй гөлöс.

«Мый тайö?— чуймис сійö, регыдджык дзебсис пельöс сайö да заводитіс кывзысьны. Керкаын збыльысь сёрнитіс мужичöй, и детинкалön сувтіс юрсыс:— Гашкö, учитель... либö попыд нин?!»

Геня гусьön пырис посводзö, муніс пемыд пельöсö, пельпомнас лэдзчысис чулан öдзöс бердö да ещö норджыка бöрддзис. Татысь сійöс и аддзис бабыс, коді самöвар пузьöм бöрын петіс чуланö сола тшакла. Стараука зурасис бөрдысь детинка вылö да весьöпöрмöныс повзис.

— О, господьö, Генюш!— юрас кутчысис сійö.— Мый нö нин тэкöд лои, мыйысь бөрдан? Коді тэнö мый вöчис?

Бабыс кватитіс детинкаöс сойбордйöдыс да заводитіс кыскыны пемыдінысь. Геня кыкнан кинас шаширитчис öдзöс кöсякö, эз сетчы.

— Пырам керкаас,— гораа шöпнитіс бабыс да кызкö зэв меліа содтіс:— Батьыд öд воис, батьыд!..

Геня вылö быттö ушатысь бузгысны йиа ва. Батьсö сійö омöля и помнитö. Сизим во саяс нин сійö прамöя эз волы гортас. Кызди шулывлісны бабыс да мамыс, багыс первой уджаліс Ёкуша заводуын вөрпилитанінын, сэсся ветліс тундраö, а тундраысь воём бöрын, кöть важöнкодь коли призывайтчан воис, босьтісны, да вит во нин вöлі салдатскöй служба вылын. Сы йылысь, мый кöнкö эм бать, Геня тöдіс ёнджыкасö мамлön да баблön сёрнияс серти да батысьянь шочиника воылысь письмöясысь дöва пи Ёгорлön «Генялы низкöй поклон» лыддьöдлöм серти. «Генялы низкöй поклон» кывъяс бöрын детинкалы памятьö воылысьны батыслön пидзöс пом вылын. сійöс качайтлöмыс, туйысь воигъясö гöснеч вайлöмыс да медбөръя мунігön морöс бердö топöдöмön сикт по-

модз мездорын нуомыс. Но ставыс тайо син водзо сувтлывліс кутшомко аслыссяма вуджор пыр. Од сэки, кор батыс нуисны салдато, ловья на воли Геня-лөн дедыс, код йылысь они бабыс сыоқыда лолаліг-тыр казтывліс: «Важон, вердысьнымлөн, конко, сісьмисны лыясыс».

Таво, гижны велалыштөм бөрын, Геня быдса рыт мырсис — мамыс да бабыс висьтавлісны, а сійо гижис дас саяс поклон, но тайо письмо выло некутшом вочакыв эз волы. И друг, кор детинкаос суис ыджыд притча, сы юр весьтын гымыштіс: «Батыд воис»... Кутшом синмон сійо они пырас керкао да сувтас батыс водзо?

«Ог, ог пыр!» — чорыда шуис аслыс Геня да кыкнан кинас ещо енджыка шашаритчис одзос вугйо, а бабыс мый вынысь кыкис сійос да шуаліс:

— Мый тэкод лои, бласло кристос? Мыйла петитчан? Лок пырам...

Мыйта коть эз пыксы Геня, бабыс веніс сійос, а сэсся, шум кылөм бөрын, посводзо уськодчис мамыс, да найо кыкон кыкисны детинкаос керкао.

Пызан сайын пукалісны салдатской паськома кык тодтөм мужик. Отиыс воли бөрлань шыльөдом лөстала сьод юрсиа, устөм-тоштөм. Модыс — вывлань чикыльтчөм еджгов уска да сэтшөм жо еджгов кудритчөм юрсиа, ертыс дорысь векныдджык пельпомъяса, шөр арлыда косіник морт.

Геняос вайөдісны на дінө да вирөссьөм кисө мырдөн сетісны уска мужичөйлы кио:

— Видзаась батыдкод, видзаась!..

Батыс нюм тыра долыд синъясон меліа видзөдіс пи вылас да серамсор шуис:

— Ок тэ! Жөник лоөмыд... Аски корасыны ковмас мунны, а тэ бөрдан... Коді нин сэтшөмасө обидитіс?

Мамыслы син улө уси пиыслөн гырдоэсьөм пельыс да чуймис:

— О, господьёй! Мый нё тайё татшөмыс? Кодкөд косясин?

Ставныс син паськөдөмөн видзөдісны Геня вылө. Детинка нинөм эз шу. Батыс матыстис сійөс ас дінас да небыдика малыштис юрсиөдыс. Геня топөдчис юрнас батыс морөс бердө да сыркъяліс-бөрдис, а мамыс да бабыс вежмөн юасисны:

— Мый нё, пиук, лоис?

— Коді өбидитис?

— Нөйтис кодкө?

Генялөн доймымөн топавлі сьөлөмыс, чөв олыштис, сэссия сыркъялігтыр кызмырдөн шуис:

— Школаыс вөтлісны.

Шөйөвошөм мамыс дыр нинөм эз вермы шуны, сэссия, синвасө нылалігтыр, усьөм гөлөсөн юалис:

— Пельтө нө кытчө дойдін?

Бабыс сэк кості көтөдіс сөстөм рузум да, внукуыс чужөм вылысь косьмөм вирсө чышкалігтыр, меліа броткөдчис:

— Дерт нин, көнкө, кодкөдкө тышкасин... Бурись оз вөтлывны школаысь.

— Нөйтін кодөскө?— писө юрөд малалис батыс.

И та бөрын Геня, кияснас синъяссө тупкөмөн, висьталіс, кызди ставыс тайё артмис.

Батыс чөв олыштис, сэссия ышловзис да лабутнөя шуис:

— Кыдзкө сідз нин артмө. Менө коркө тадзи жө дяк пиөс «өбидитөмысь» вөтлісны. Воөн-джынийөн велөдчи. Ставыс тайөн и помасис. Сійө менө нөйтис, а ме коли мыжанас. Мый вөчан? Эм пөслөвича: «Коді овыр, сійө и вына...» Но нинөм!

Батыс чөв олыштис, сэссия чорзьөм ки пыдөснас чышкаліс пиыслысь век на сөдзтысьысь синвасө:

— Дугды бөрднытө. Синванад шогтө он мыськав! Тадзи помасис Генялөн школаын велөдчөмыс. Сьөкыд вөлі первой луньясас миритчыны артмөмторйис-

көд, но нинөм он вөч. Мамыс заводитліс ыстывны
батьсө Саватий поп дінө, сёрнитлыны, оз-ө бөр босыт-
ны детинкаөс школаө, но батьыс вочавидзис:

— Мед нин мукөдъяс ветлөдлөны... милөсть кор-
сьоны. Ми татшөмторъясас абу велалөмаөсь!

* * *

Салдатысь воөм бөрын Микол Иван, Генялөн
батьыс, дыр висис. Кардорсянь Көйнөса трактөд матө
тысяча верст локтіс подөн. Веж мороз дырйи юж туй
вывті кучик сапөгөн дзурликтігөн кокъясыс кынма-
лісны да өні пыктісны краж кодьөдз. Вөвлөм салдат
дзикөдз коктөммис, кык вежонысь дырджык эз петав
керкаысь. Да и гортас местасө вежны вермывліс сө-
мын бедь йылын либө гортсаяс отсөгөн.

Батя-пия овмөдчисны пыді комнатаө, көні дед
кулөм бөрын пөшти некор эз овывны. Лунъяссө Геня
колявліс батьыс дінын, отсавліс сылы кок йылө
сувтны либө котөртывліс кытчөкө могөн. Кыкнад
олігөн Геня өна велаліс батьыс дорө. Детинкалы чайт-
сис, мый некод оз төд вельторъяссө сылөн бать мын-
да. Заводитас сійө казъывны важсө да бытьөкө
мойдө. Висьтавлывліс сійө и аслас челядьдырся олөм-
вылөм йылысь, Печора да Усва юяс кузя каюкъясөн¹
озыр йөзлы көр яй кылөдывлөм йылысь. Висьтавл-
ывліс сідзжө гырысь каръяс йылысь, аслас сьөкыд
салдатскөй олөм йылысь.

— Эк, веськавлыны эськө гырысь каръясө!—
корсюрө ышлолавліс детинка.

— Воас кад — и веськавлан гырысь каръясө,—
шулывліс батьыс.

Генялөн вөлі мича вөсни гөлөс, зэв бур слух.
Прөст кадъясө найө батьыскөд сывывливлісны нори-
ник сыланкывъяс.

¹ Каюк — ыджыд пыж.

Рытъясын на ордö пыравлывліс Вася Манзадей, висьтавліс школаса выльторъяс йылысь.

Долыда кольлывлісны лунъясыс. Таысь бурджык олöмыс Генялы эз и ков. Сöмын, дженъыдöсь тай век овлöны шуда часъясыд. Тулысладор Иванлөн семьяыс лунысь-лун век ёнджыка дзескаліс сёянөн. Гёра-көдзандырся уджъяс вылö лачаён Иванлөн гётырыс вайліс купеч Мефодийлысь пуд джын пызь, но пуд джын-йыд — пуд джын и эм: бара кутіс помасыны.

Öти рытö, ывла пемдигөн, найö семья котырөн пуксисны чай юны. Пызан вылын дзизгис-сыліс ас-сыс сыланкывсö куснясьöм бокаса важ самöвар. Джаджйын ломаліс керка пытшкөссö муртса югдöдысь дзузган би.

Геня пукаліс самöварсянь кайысь шоньд руөн пöсялöм öшинь дорын. Сыкөд орччөн, пызан пельöсын, вöлі батыс, а пызан мöдар бокас — бабыс. Мамыс пызан помын вöсньыдик шöрöмъясö шöравліс нянь тупöсь. Геня ныр улö пуктіс медся кыз шöрöмсö, мыччис гыж йыв ыджда сакар тор да шуис:

— На, пиук, сёй да сэсса эн кор... абу.

Геня босьтіс нянь кусөксö да сакар торсö. Батыс син бöжнас гусьöникөн видзöдліс сы вылö да сьöкыда ышловзис.

Недыр кежлö пуксыліс ыджыд чöвлун, кутшöмкө аслыссяма сьöкыд чöвлун. Геня эз лысьт видзöдлыны пызан сайын пукалысьяс вылö. Сакар торсö курччöм бöрын сійö мыжа морт моз дзедис синъяссö, регыджык кутчысис чай тыра блюдйö.

— Ог тöд, мый сэсса кутам сёйны,— неыджыд кост бöрын чöвлунсö дзугис мамыс.— Аски ещö ичöтика пöжала, а сэсса и...

— Кокъяс бурдыштисны нин,— мамыслысь сёрнисö ордіс батыс.— Аски ветла Мирон Кузьма ордö. Гашкө, уджөн сетлас öти мешök пызь. Кызкө кузь кадөн мынтам...

Геня кывзис, мый шуас мамыс, но сійö нинöм эз шу.

Мöд луннас Микол Иван бедь отсöгөн мөдöдчис Мирон Кузьма ордö, кодлөн керкаыс вöлі насянь верстысь унджык сайын. Висьöмыс дзикöдз нёнъштöма вынсö, да муртса и гортö бöрсö воис. Ывлаыс вöлі рыт нин, кор сійö пöрччысис да сьöкыда пуксис лабич вылö. Геня пуксис батыс динö.

— Кызкö нö волін жö?— тöждысян синъясөн бать вылас видзöдліс Генялөн мös лысьтанінысь пырысь мамыс.

— Кызмырдөн,— сьöкыда лолыштіс батыс.— Аски Генякөд даддён ветланныд... Öткөннад сьökыд лоö кыскыны.

— Уна-ö нö?

— Öти мешök.

— И сы вылö аттьö. Бур йöз бара на мездöны тшыглы кулöмысь.

— Да-а-а!— плешö көрис батыс.— Аслад удж вылö мездасны.

— Кызди нö көть лöсьöдчинныд?

— Лöсьöдчим тай... Гожся уджъяс дырйи тэ налы тані уджалыштан, а ме кымынкö лун мысти муна Кузьмалы Колва йылысь көр яй кылöдны.

Генялөн мамыс дыр чöv оліс: тыдалö, сьölöмсö дойдіс верöслөн Колва йылö мунöм йылысь юöрыс. Сэсса, пöдөнчасö кывтö пунктöм бöрын, некод вылö видзöдтөг, усьöм гөлөсөн шуис:

— Кытчökö мун татшöм кокъяснад... Дзикöдз нинöмö воан.

— Мый нö вöчан,— табак көшельсö перйис батыс.— Шуис жö тай, ставыс кө пö лючки-ладнö лоас, бöрыннас содтышта, да тöда ме тайö кöинъяссö... Нинтö бöрыннас кульсьöма нин!

— Абу на ёна лышкыд Мирон Кузьмаыд,— ышловзис мамныс.

Геня эз вермы водзё кывзыны тайё сьёкыд сёрнисё, кайис пёлатьё, водіс да кияснас вевттис чужёмсё.

Аскинас детинка мамыскөд даддьён муніс Мирон Кузьма ордё няньла. Пызь сетысьёс виччысигмоз найё пырисны купечлөн лавкаё. Детинка эз тёд, мыйсянь заводитны видзөднысё: полкаяс дзик тырөсь быдсяма төварнас.

Вузасьысьыс, Кузьмалён зятъыс, табак тшынысь вижөдём, идзас рёма уска кузьмөс чужёма Трөпим, буретш кодлыкё мерайтіс лөз ситеч. Пемыд пельөсысь шытөг петіс кышөдтём маличаа Кузьма, кутшөмкө ветьökөн рөсолөсь кияссё чышкалігмоз, видзөдыштіс мерайтчысь зятъыс вылө.

— Стөчджыка мерайт,— эз вермы кутчысьны купеч.— Мирыслы сунис помён, а вузасьысьлы дөрөм тыр...

Зятъыс нинөм эз шу. Кузьма видзөдліс ньөбасьысь вылө да юаліс:

— Тайё нө тэ Савалы мерайтан?

— Сылы,— шуис Трөпим.

— Сылөн, буракө, кольём вося уджйөзыс на кысьё чөлкөвөй кымын, колө бергөдны...

— Бергөді,— шуис зятъыс.

Геня, мамыс мыш сайё дзёбсьөмөн, гусьён видзөдіс зыр кодъ паськыд гөрд тошка, лыс лапъяс моз өшйөм синкымъяса Кузьма вылө да шензис:

«Ачыс купеч, а маличашойөн ветлөдлө!»

Пызь мешөк пөлучитём бөрын мама-пия петісны дворө. Двор пасьталаыс туплясисны жугласьём көр дадыяс, бөчкаяс.

— Дзик кощөй кодъ,— пөвйысь вөчөм өградаысь петігөн шуис Генялөн мамыс.— Озырлуныс нель амбарө оз төр, а век оз убелит шыблавны жугласьём бөчкаяссё да көр дадыяссё.



— Ачыс купеч, а важ маличашойөн ветлөдлө,—
век на шензис Геня.

— Уна дорад век унджык колө,— ки гөгöрыс
дадь көвсö гартыштис мамыс.— Киссьöм дадьяссö ар
кежлö бара на дзоньтöдалас.

Мама-пия мөдөдчисны туй кузя. Мамыс көвийд
кыкис, а Геня мыйвынсьыс йөтлалис дадьсö.

— Тэ вынсьыд вывти эн зэвтчы,— пийс вылө
мелиа видзөдливлис мам.

— Ог,— юрсö пыркөдис Геня.— Тайö дадьтö ме
өтнам кокныда кыска!

— Ок, кутшöм багатыр!— эз вермы дзезбны нюмсö
мамыс.

Гортö воём бöрын пызь мешöксö мама-пия пыр-
тисны дадьнас чуланö, да мамыс ноксис на сэни, а Геня
пырис керкаö. Сэни батыс динин комната тыр пука-
лисны мужикъяс да том йөз. Сидзкө, найö бара төл-
куйтöны заработок корсьны муналöм йылысь. Сэт-
чөдз куритчöмаөсь, мый лөз тшын пырыс сьöкыд ве-
жөртны водз лабичын пукалысьяслысь чужöмнысö.

Геня пөрччис маличасо, дөрөм соснас чышкалис гөрдөдөм чужөм выло чепөсийөм пөсөсө, локтис батыс динө да пуксис ськөд орччөн.

— Вайинныд?— юалис батыс.

— Вайим,— шуис Геня.— Дзикөдз пөсяли.

Мужикъяс чукөрын пукалысь Калина бергөдчис детинкалань:

— Ставсө вайинныд али Кузьмаислыг колыштинныд жө?

— Ваян ставсө!— нырсө көрлис Геня.— Сылөн сәни сы ыжда складъяс... өти куш няныс миянлы ставлы тырмас сө во кежлө!

— Вернө!— аслас кыз гөлөсөн серөктис Гора Иван.— Сө вотө ми воклы тырмас!

— Миянлы эськө, Пантелей Петрович, көть тысячаөд юкөнсө Кузьма озырлунлысь,— орччөн пукалысь Көсөй Паньколы тувкис Калина.— Сәки эськө тэа-меа водам паччөрө да пөтөлөкө сьөлалам!..

— Юсян,— нюммунис Панько.

— Озырлуннад быд йөйис олас,— шуис Генялөн батыс.— Вот озырлунтөгыс колө кужны овны.— Сийө бергөдчис пиыслань да юалис:— Кузьма ордас али мый колин мамтө?

— Эг,— юрсө пыркөдис Геня.— Найө бабкөд чуланынөсь.

— Ой-ой-ой!— өдзөсөд мыччысьөмкөд тшөтш шензис Иван гөтыр.— Пуксьөмаөсь дас мужик да шпуккөны... Көть мед юшкасө восьтинныд. Пөданныд!

— Нинөм оз ло, Васильевна,— шуис Ёгор.— Калина кодем табак тшыннас көптитчөмаөсь нин.

Пырис Вася Манзадей. Керка тыр йөзөс аддзөм бөрын сийө падмис да сувтис өдзөс порог дорө.

— Мый нө, Вася, сувтин порог дорас?— сы динө шыасис Генялөн мамыс.— Прөйдит водзө.

— Ме регыдик кежлө,— шуис Вася да пуксис паччөрө каян пос тшупөд вылө.

Кодсюрö видзöдлісны сы вылö, но пыр жö бөр вунöдісны детинка йылысь. Вася чуньнас корис ас дінас Геняöс да пеляс вашкöдіс:

— Политиктö, код йылысь сёрнитлісны, вайöдісны...

— Збыль?— синъяссö шармöдіс Геня.— Кытчö нуöдісны?

— Управаö,— шуис Вася.— Став челядь котөртісны сэтчö. Ветлам, видзöдлам?

— Ветлам,— сöгласитчис Геня да, мед ставөн кывласны, нарошнö гораа шыасис батыс дінö:— Батьö! Политиктö вайöдöмаöсь.

— Но-о,— öтпырйö шыасисны некымынөн, а Генялөн батыс юалис Васялысь:

— Öтиöс вайöдісны?

— Öтиöс,— шуис Вася.— Кутшöмкö тöдтöм исправник да татчöс урядник нуöдісны управаö.

Мужикъяслөн сёрнитанторйис пыр жö вежсис. Гора Иван кыз гөлöснас мургис:

— Сідзкö, абу прöста больгöмаöсь. Уездö пö быдса этап вайöдöмаöсь тайö безбожникъястö, да кутасны разöдны сиктъясö.

— Артмö, збыль сідзи,— чеччис Ёгор да шыасис ёртъяс дінас:— Гашкö, ветламöй, видзöдлам?..

— Видзöдлам,— сöгласитчисны том йöз.

— Чудеса,— пасьтасигмозыс аскöдыс сёрнитис Калина.— Сідзкö, Сибырыд тыр нин татшöм юр вундысьяснас, миянö кö кутісны вайны.

— Ачyd тэ юр вундысь,— вомалис Ёгор другыс.

— Ме тшöтш ветла,— батыс дінö шыасис Геня.

— Ветлы,— шуис батыс, а мамыс öлöдіс:

— Ёна дыр эн уяв.

— Ог,— шуис Геня, крöвать вылысь кватитіс малчасö, тэрмасьöмөн пасьталіс да тövзис ывлаö.

Управа дорын талун йöзыс жуёмөн жуис. Татчö

дугдывтөг люзгысны том йөз и олөмаяс. Челядь кавшасьөмаось матигөгөрса потшөсьяс вылө, сарайяс вылө да сэсянь видзөдоны управа өшиньясө. Унаөн сулалісны управалөн джуджыд кильчө вылын. Беринось чужөма рыжөй Прошка катшаяс моз дзирнясис медся кузь потшөс майөг йылын. Геняөс да Васяөс аддзөм бөрын сійө чеччис майөг йылысь, котөртис налы паныд да чуньнас индіс управа өшиньяслань:

— Эсію комнатаас пукалө!..

— Тэ аддзылін сійөс?— юаліс Геня.

— Дерт жө!— шуис Прошка.— Ме видзөді, кыдзи найө исправниккөд кайисны кильчө поскөдыс,— тэрмасьөмысла кыв помъяс нылалігтыр содтіс сійө да гажаа мигнитіс синкымъястөм руд синъяснас:— Прошкаыд оз узь!

Вася завидьпырысь видзөдіс сы вылө, а Геня юаліс:

— Но, кутшөмджык сійө?

— Ок интереснөй!— юрсө дзөрөдіс Прошка.— Синъясыс гырысьөсь, гөгрөсөсь, юрсиыс поплөн кодь, а тошкыс веськыда гөгйөдзыс! Сэтшөм страшнөй... Ой!

— Но, а кытчө сійөс өні воштасны?— юаліс Вася.

— Чижовкаө, кытчө сэсся,— шуис Прошка, быттьөкө сы сайын вөлі тайө делөыс.— Миян урядник кытчөкө муніс, тыдалө, ключьясла.

Прихожөйө пыран коридорыс вөлі шөтөма йөзнас. Кильчө дорын Геняяслөн сёрнитігкості Ёгор да сылөн ёртъясыс вошины йөз пиас: писькөдчисны управаө.

Детинкаяс кайисны кильчө вылө.

— Пыралам, видзөдлам?— Васялысь юаліс Геня.

— Пола,— пельпомъяссө лэптыштліс Вася.

Прошка кватитіс сійөс сойөдыс да кыскис ас бөрсяыс:

— Мыйысь повнысө? Мөдім!

Куим друг пискөдчисны комнаталон восьса өдзөс дорө, но йөзыслон юръясыс сайөдичны да водзысь нинөм эз тыдав. Водзө прөйдитны полысь мужикъяс видзөдичны тасянь төдтөм морт вылө, быттө сийө вөли ош. Прошка воськовтис комнатаө, но өдзөс дорө йөрмис, эз вермы мунны водзө ни бөрө. Геня сувтис порог вылө, кыпөдчис кок чунь йылө, нюжөдич голясө да юръяс вывтис первой Прошкаон гарыштөм исправниксө, кодис, тыдалө, воөма уездной центрысь да өни пукалис тани пызан сайын, а сөсса сысянь веськыдвылын өшинь дорын пукалысь төдтөм мортөс. Сийө вөли дзугсьөм сьод юрсиа, сэтшөм жө сьод уска да ичөтик тошка, лөзоват тужуркаа да вушйысьөм кучик сапөга том морт. Геня ногон, позис сетны сылы уна вылө кызь вит-кызь сизим ар. Төдтөм морт пукалис кызкө прөстөя, вильыш сөдз синъясөн гажаа видзөдич өдзөс дорын өта-мөд динө ниртчысь йөз вылө да горша ньылыштлывлис курутчан трубкысь тшынсө. Кок динас джоджын сулалис ичөтик чөмөдан.

Геня некымынысь сюся видзөдлич сы вылө. Некутшөм гөгрөс синъяс, поплон кодь юрси ни гөйөдз тош төдтөм мортлон эз вөвны.

«Ок и удитлан жө тэ нинөм абусө больгыны, Прошка!— шензис сийө, лөсьөдич печиксө, метитчис Прошкалон сы водзладорын чурвидзысь гөрд юрө да мый вынсыс калкис-печиктис юр пыдөсас.

Прошка малыштис печиктаниссө, видзөдлич Геня вылө да нюжөдлич кывсө.

— Каличтөм вом!— гораа вашкөдич сылы Геня.— Мыйла пөръясян?

Прошка сөмын паськыда нюммунис, руд синъяс нас индич өшинь дорын пукалысь төдтөм морт вылө да сидзи жө вашкөдич:

— Со тай... Он өмөй аддзы?

Геня ещө өтчюд сюся видзөдлич политик вылө, но нинөм страшнойсө эз аддзы: морт — морт и эм!

Сы дорö порог вылö кайис Вася другыс да гораа вашкөдөмөн жö юалис:

— Көнi сийö?

— Со тай,— öшинь дорын пукалысь морт вылö син бöжнас индiс Геня.

Вася шензяна синъясөн видзөдлiс сы вылö, сэсся Прощка вылö да лэптыштлiс пельпомъяссö:

— Ог гөгөрво.

— Да Прощкаыд синнас абу аддзылöма сийöс!— кинас öвтыштiс Геня.— Прöста больгö...

Прощкалөн думыштöмтор, вөлөмкö, и «политикöс» чижовкаö пуксьөдöмыс. Волостной управаö локтiс вижөдөм пиньяса, векни чужöма, потш кодь кузь урядник Никитка да висьталiс исправниклы:

— Танi шор саяс олö öтка старука Мелентьевна. Сийö көсйысис лэдзны патераö.

— Бур,— чуньяснас пызанö барабанитiс исправник, бергөдчис «политиклань» да шуис:

— Со и патера корсисны.

— Аттьö,— шуис «политик», чеччис да босьтiс чемодансö.— Ме дась.

Исправник чöv олыштiс, сэсся бара чунь помъяснас сяркөдыштiс пызан пөвйö:

— Бур. Кыдзи асьтö кутны, корьясö управаö явитчывны, думайта, оз ков велөдны.

— Аттьö, удитi ставторнас төдмасьны,— муртса төдчымөн нюммунис «политик».

Исправник век жö лыддис коланаөн шуны ассяныс кымынкö кыв:

— Öметитчыны волывны индөм кадö, юасьтөг-висьтасьтөг сиктысь некытчö не мунны...

— Ставыс гөгөрвоана,— шуис «политик», шапкаасис да урядник бөрся мөдөдчис өдзөслань.

Мужикьяс ыльөбөн уськөдчисны ывлаö. Детинкаяс төвзисны на водзвылын.

Двород котортигон Вася Манзадей кылис мужикьяслыс сёрни.

— Шуоныс сийос кызди?— кылө, оти мужикюалис модлыс.

— Бесыс төдө,— вочавидзис модыс.

Геня, Вася да Прошка колльодисны мунысьясос Мелентьевна калитка дорөдз, сулалыштисны сәни, но пырны керкаө эз лысытны и ньөжйөнникон бөр восьлалисны мир туй кузя. Васялы дум вылө уси управа дворын мужикьяслон сёрнитомыс да юалис ёртьясылыс:

— Интереснө, эм абу тайө политикьясылон нимыс?

— Нимыс?— юалис Геня да думыштчис, а Прошка ньоти падьявтөг эскөдис:

— Абу, политикьясыдлөн некутшөм мод ним абу.

— Тэ эськө нинөм он төд!— сы вылө көсөйтчылис Геня.

— Но, ог төд!— наивнөя нюммунис Прошка.— Тайос жө быдөн төдоны.

Геня век жө эз веритчы Прошкалы. Детинка думайтис-думайтис да сылы кажитчис, мый политикьяслон, кызди и став мукөдлөн, эм ним, вич дай ов. Но чорыда шуны та йылыс ёртьясылыс сийө эз лысыт, а аслыс шуис:

«Гортын батылыс юала».

Колө шуны, тайө рытө Макла сиктын Мелентьевнаыс кызди, кодлы выль патерщикыс асьсө шуис Гриша Невольскийон, некод на эз төд, кызди шуоны найө сиктса выль олысьсөс, кытыс, кутшөм мыжыс сийос вайөдисны татчө.

Гортас детинкалы батыс шуис, мый «политикьяс»— сәтшөм жө йөз, кутшөмөсь мукөдьяс, сідзкө, налөн эм ним, вич да ов. А кымынкө лун мысти детинка төдмалис, мый Мелентьевналыс па-

терщиксö шуöны Григорий Матвеевич Невольскийöн. Ыстытöдзыс пö сийö уджавлöма кутшöмкö питерскöй заводуын кузнечöн либö слесарöн. Мелентьевна ордын сийö первой лунъясас жö лöсьöдiс ичöтик слесарнöй мастерскöй. Ковмас кодлыкö пöчинитны томан либö вöчны ключ — «политик» век дась.

* *
* *
* *

Тулыс пыр матыстчис и матыстчис. Дженъидджыкöсь да шоныдджыкöсь лоины войвывса кöдзыд войяс. Син водзын сылiсны да ляпкалiсны сьöдасьöм лым толаяс. Öшинъ увъясын волявлiсны нин рöмпöштан кодъ шылъд ва гöпъяс. Благовещеннö кeжлö воисны ракаяс, Изъваын да Печораын медводдза «тувсов» лëбачъяс.

— Ракаяс воöмаöсь, ракаяс! — на бöрся вöтлысисны челядь.

Генялöн батыс, Иван Дуркин, бурдыштiс да заводитiс лöсьöдчыны мунны Колва йылö. Öнi, тулысладорыд, тайö туйыс войвывса став мукöд кузь туйяс моз жö — сöмын мученнö. Трактъяс абуöсь. Пöшти век ковмас мунны паськыд Печоралöн да чукльöсь Колвалöн йи вывтi. Оз кö суны туйын пургаяс — слава богу. А скöравны кö кутас поводдяыс — ок, уна и сюрас панявны катша шыдöс! Квайтсё верст ковмас мунны подöн Колва йылöдз. А квайтсё верстыд — абу квайтсё воськов. Унаысь лö пуксьывны коктö шойчöдны, уна вой ковмас узыны весиг ывлаын. Но йи кылавтöдз быть ковмас воöдчыны места вылö.

Кöть и тöлыс чорыда на водзсасис, шоныд лунъяс вежласисны чизыр вой тöлөн да пургаясөн, таво виччыссис водз тулыс. Вöла туйяс не сöмын сьöдасисны вылö колъысь куйöднас, но и на дiнысь лым ляпкалöм бöрын восьсаинъясын найö лоины насыпъ кодьöсь.

Геня нимкодясис локтысь тулыс вылö, но сэк жö матысмысь тулысыс повзьöдлiс сийöс. Детинкалы эз

вөв окота выльысь торйөдчыны батыскөд. Сійө весиг войяснас кутіс частө садьмывлыны, төждысис ви-сьысь бать вөснаыс, мам вөснаыс, кодлы бара ковмас өтнаслы мырсыны гөриг-көдзигөн да вундіг-вартігөн. Детинка эз көсйы торйөдчыны батыскөд, а торйөд-чан кадыс век жө воис.

Благовещеннө бөрын лун-мөд мысти батыс көлуй-торсө тэчис ноп мешөкө да аслас сиктса кык ёрткөд, Калина Каневкөд да Көсөй Панькокөд, мөдөдчис туйө. Медым кузь туйын оз су кутшөмкө притча, гор-тысь петөм водзвылын, кызди пыр вөчлісны важ йөз, Иванлөн семьяыс сулалыштис «ен водзын», сэсся не-дыр пукалыштис кыв ни джын шутөг. Та бөрын мамыс да гөтырыс мунысьөс колльөдісны калитка дорөдз, а Геня муніс батыскөд сикт помөдз.

— Но, мун гортө,— сәні шуис сылы батыс да окыштис.— Бура ов. Отсась мамыдлы да бабыдлы, а ме воа арнас, тәныд вая гөснеч.

— Ловъя кыньпи вай,— шуис Геня.

— Вая,— көсйысис батыс.

Генялы зэв окота вөлі мунны батыскөд тшөтш, и кытчөкө кө матөджык, дерт, эз кольчы сыысь, но ылі туйө сійө эз лысьт вөзйысьны.

Батыс ёртъясыскөд вөслаліс сьодасьөм туй кузя да регыд саялі туй чукыль сайө. Геня ещө өти здук сулаліс сикт помын, сэсся, юрсө өшөдөмөн, вөслаліс гортас.

* * *

Батыс мунөм бөрын первой лунъяссө Геня гаж-төмчис, эз адззы аслыс места. Сьөлөмыс личмунлыв-ліс сөмын Вася Манзадей другыс дырйи, коді быд лун волывліс урокъяс помасьөм бөрын. Найө өтлаын ре-шайтлісны задачаяс, гижлісны, урокъяс велөдөм бө-рын ворслісны. Но коркө өтчид Вася немвиччысьтөг юөртис Генялы асьыс гуся думсө: детинка көсйө эновтны школасө да ю воссьытөдз мунны Усва бокө,

медым кӧраяслӧн гожсяніӧ мунігӧн веськӧдчыны бать-мам дінӧ. Кута кӧ пӧ виччысьны йи кылалӧм, коля гожӧм кежлӧ море дорӧ мунысь стадаысь да арӧдзыс ковмас шатайтчыны кӧнкӧ Усва либӧ Адзва дорса сиктъясын. Тайӧ пӧ ӧти. А мӧд-кӧ, шуӧ, школаын некутшӧм олӧм эз ло.

Збыльысь, Геняӧс школаысь вӧтлӧм бӧрын, Вася вылын купеч пиян ещӧ ёнджыка кутісны тешитчыны. Мыйсӧ бара найӧ эз вӧчлыны! Сӧмын удитас Вася чеччыны парта сайысь — найӧ кодакӧ кості улӧс вылас кисьтӧмаӧсь чернила, медым лякӧссяс сылӧн гачыс, а сӧсся ваксьӧны-сералӧны. Перемена дырйи петас Вася классысь — бара нин партасыс босьтӧмаӧсь сылысь тетрадьсӧ да гижалӧны быдсяма лӧк кывсӧ.

Купеч пиян вылӧ видзӧдӧмӧн вильшасисны тшӧтш кодсюрӧ мукӧд. Олӧм эз ло! Вася эз лысьт некодлы норасыны на вылӧ, чӧв оліс, виччысис сійӧ лунсӧ, кор мунас бӧр тундраӧ бать-мам дінас. Сӧки пӧ мына став тайӧ тешитчӧмъяссыс.

Вӧзйысьны яй кылӧдысьяслы, медым сійӧс аскӧдныс тшӧтш нуӧдісны тундраӧ, Вася эз смелмӧдчы. А йи кылалӧм виччысьны немыдз эз позь. Сӧки сійӧ вермис не веськавны батысьясслӧн стадаӧ не сӧмын Усва бокын, но и Адзваын, да ковмис гожӧмбыдовны йӧз ордын.

Вася став тайӧтор йывсьыс висьталіс Геня другыслы. Найӧ ӧтлаын мӧдісны гадайтны, кызди петны тайӧ сьӧкыд положениесыс. Шоръяс воссялісны нин, но кӧдзыд войясӧ артмывліс на сэтшӧм чарӧм, мый мортлы кытчӧ гажыс позис чарӧм вывті мунны лызтьӧг. Вася шуис ӧтнасӧн мӧдӧдчыны подӧн. Геня эз ошкы. Тайӧ лунъясӧ пӧ Макла дорті войвылӧ мӧдӧдчасны медбӧръя кӧр стадаяс. Сӧні тшӧтш мунны кутас и Федя Истомин, кодкӧд бура тӧдсаӧсь детинкаяс.

Тшөкта пö мамлы сёрнитлыны, медым Федя аскöдыс босьтас тэнö.

Тадзи найö и вöчисны. Федя сöгласитчис, сöмын тшөктис детинкалы асья чарöм вывти мунны кызь веретсайса кушникöдз, мед оз тöдлыны пастуклөн көзьеваыс.

— А öни кывнытö кутöй пинь саяныд,— детинка-ясöс öлöдис Федя.

Бөръя войсö коллявны Вася локтис Геня ордö. Кык друг мöдöдчисны сикт помö сир вöчысь ордö сир вала. Туй вылын на динö öтувтчис Прощка, кодкөд Геня сёрнитчис нин Васяöс колльöдигмоз ветлыны даддьөн зорöд местаясысь турунтор вайны.

Детинкаяс локтисны гортö. Чой горулын зонпосни ноксисны луннас вöчöм лым морт дорын. Челядь чукöрын вöлины тшöтш Ванюк Самко да Мефодь Мишка.

— Кежалам,— ёртъясыс динö шыясис Прощка.— Лым мортыслысь сылидзирсö песовтам...

— Сёр нин,— шуис Геня.— Асывнас ковмас водз чеччыны...

— Но, войыс кузь на,— ворсысьяс дорö мöдöдчис Прощка.— Лым мортыслысь юрсö сöтыштам, и — гортö!

Геня да Вася кольчисны туй дорö, морöснаныс лэдзчисисны потшöс вылö да виччисисны, мый кутас вöчны Прощка.

— Эй, чом бöрысь кольöм яран,— Вася Манзадейöс казылём бöрын горöдис Самко.— Волы татчö, ордлыястö лыддям!

— Балябöжыд луддзис?— воча горöдис Геня.— Колöкö, волам, гыжъялыштам...

— Сювйыд вöсни!— горöдис Самко, но сэк жö адзис мöд туйöд налань локтысь нывкаöс. Сой вылас сылөн вöли дöраөн вевттьöм ичöтик сямöд доз: буракö, ветлёма суседъяс ордö изны.

— Чуркасö поткöдам, чуркасö!— лым ёкмыль ква-

титіс да ныв дінö уськөдчис сійö.— Ставөн ме бөрся!..

Мефодь Мишка да ещö гоз-мөд детинка вöтчисны сы бөрся.

Нывка заводитіс котөртны. Самко суөдіс сійös, конйыштіс. Ныв кымыньөн тювмуні-уси туй вылö. Пызь дозйыс лэбзис ылö бокö, да пызыс тшын-бусөн паськалі куйöда туй пасьта.

Ныв заводитіс лёкысь горзыны-бөрдны. Геня да Вася уськөдчисны сы дінö, а Прошка суөдіс пышйысь Самкоös да кватитіс морösöдыс:

— Тэ мый вöчан, мироед?

Вася мөдөдчис Прошкалы отсөг вылö, но Самко-лөн Мишка другыс потшис сылы туйсö:

— Эн матыстчы, яран!..

Васялөн скöрысла югнитісны пыдын пукалысь векни сьöd синъясыс.

— Ме тэныд петкөдла «яран»!— шуис сійö да мый вынсьыс сідзи кулакнас лөсыштіс Мишкалы ныр-вомас, мый сылөн нырсьыс пыр жö ыльöбтіс вир. Купеч пи кыкнан кинас кутчысис чужöмас да, лёкгөршөн равзігтыр, котөртіс бокö, а Вася уськөдчис Прошкаös му бердö личкысь Самко дінö, вожасис сы вылö да кыкнан кулакнас сизьдіс то öтар, то мөдар пель бокас:

— На тэныд, мироед! На тэныд, ад горш!.. Дырнин виччыси тайö здуксö!..

Самкоös Вася нöшаліс сьölөм бурмытөдзис. Прошка повзис, мый купеч пины лоö кувтөдзис, да ярмөм сьölөма ёртсö кыскис сы вылысь.

Самко лимзігтыр бауөн кыссис боклань, сэссия чечис да, мир туй кузя шатлалігтыр, котөртіс керкаяс сайö. Некөн матігөгöрын эз тыдав и Мефодь Мишка.

Геняяс, куим друг, сулалісны бөрдысь нывка дінын, зілісны бурөдны сійös.

— Эн бөрд, Дуня,— шуис Прошка.— Ми найös сідзи огö лэдзöй!

— Став пызые сы мында и вѳлі,— гырысь синъяс дорсьеы синвасѳ соснас чышкаліс Дуня.

— Налы нѳ, пон рѳдлы, мый,— шуис Геня да босътчис туй вылысь чукѳртны киссьѳм пызьсѳ. Сылы отсасисны тшѳтш Вася да Прошка, но ѳг кындзи нинѳм ѳз чукѳрмы.

Сыркъялѳмѳн бѳрдусь нывка мѳдѳдчис ѳтарѳ, а детинкаяс — мѳдарѳ.

— Но и Вася!— туй вывтѳ вѳсьлалѳгѳн шензис Прошка.— Ме весиг повзи: мися, кувтѳдз лѳѳ...

— Важѳн нин ки лудѳс,— нюммунис Вася.— Сьѳлѳм дорѳ чукѳрмѳм дойсѳ ректыштѳ. Помнитны кутасны!

— Тѳныд мый,— шуис Геня.— Аски мунаи, и медым, колѳкѳ, корсьѳны...

Прошка гѳгѳр видзѳдліс да ѳртъясыслы вашкѳдіс:

— Мед ѳськѳ талун войнас оз... Найѳ ѳд норасясны батыныслы...

— Но и мед норасьѳны!— кинас ѳвтыштѳс Геня.— Мунаи, игнасяи, и асылѳдз некодѳс ѳгѳ лѳдзѳ, а сѳни... тундраыс паськыд!

— Дерт сѳдзи,— сѳгласитчис Прошка.— Тадзи и колѳ вѳчны.

Торѳдчигѳн Прошкалы Геня тшѳктѳс асывнас шондѳ петѳгѳн локны даддѳн: чарѳм сывтѳдзис пѳколѳ бѳр воѳдчыны гортѳ.

— Смотри, мед оз узьсьы!

— ѳ, Прошка другыдлѳн оз узьсьы!— мудера синнас мигнитѳс Прошка.— Закѳтита кѳ, кык сутки синъяс ѳг куньлы.

Вася серѳктѳс.

— Мун, ѳн ошйысь!— Прошкалы пакас тувкис Геня.— Югдѳгѳн мед вѳлін миянын.

Войсѳ Вася колльѳдіс пѳшти унмовсьлытѳг. Сѳйѳдумсьеы век виччысис: вот-вот локтасны, йиркѳдчасны ѳдзѳсѳ Самко да Мишка, а гашкѳ и налѳн бать-

ясныс, пырасны урядниккөд, сійөс, Вася Манзадейөс, киясөд кутөмөн, нуөдасны тюрмаө... Но нинөм та-тшөмыс эз ло.

Ывлаыс вөлі рөмыдкодъ на — кильчө өдзөсө игөд-чис Прощка, и шонді петөм бөрын найө куимөн — Вася, Геня да Прощка — дадь вылө Васялысь ноп-торсө пуктөмөн рыныш дор чойөд тронякылысь чарөм вывтї лэччисны ю вылө. Тэчасъяс местаын тырыс кравзісны сёян корсысь ракаяс. Бокланъын, өтка пө-рысь ниа пу вылын, жбыръялісны мича лун тунъя-лысь посни лэбачъяс.

Детинкаяс воисны йи вылө да асъя чарөм вывтї сёрнитігтыр веськыда мөдөдчисны кывтыд. Ю шөрө петөм бөрын Вася сувтіс, бергөдчис да видзөдліс сикт вылө. Өти-мөдлаын буретш заводитөмаөсь тшынась-ны пач трубаяс. Вичколөн еджыд жөчөн кышөм юрын зарниөн ворсісны шонді югөръяс.

«Прөщай, Макла,— думнас шуис детинка.— Дыр жежлө колян тэ менам паметьö!»

— Ок, эськө, гожөмсө кө сюрис колявны өтла-ын,— шыасис Геня.— Уна эськө и чери кыйим!

— Да,— ышловзис Вася да содтіс воськовъяссө.



26642

БИБЛИОТЕЧКА ШКОЛЬНИКА

Яков Митрофанович Рочев

СУРОВАЯ ШКОЛА

на коми языке

Оформление М. Безносова

Редактор *В. Попов*. Техн. ред. *И. Оплеснин*
Сдано в набор 24/VII-59 г. Подп. к печати
3/X-59 г. 84×108¹/₃₂. 0,562 бум. л. 1,845 печ. л.
(Уч.-изд. л. 1,465.) Тираж 3000.
Цена 50 коп. Ц01821. Заказ № 2585.
Коми книжное издательство. Дом печати.

г. Сыктывкар, Республиканская
типография Полиграфиздата Министерства
культуры Коми АССР

UNIVERSITY OF TORONTO

LIBRARY OF THE UNIVERSITY OF TORONTO
128 St. George Street, Toronto, Ontario

Acquired by the University of Toronto
from the University of Toronto
Library of the University of Toronto

Acquired by the University of Toronto
from the University of Toronto
Library of the University of Toronto

UNIVERSITY OF TORONTO

LIBRARY OF THE UNIVERSITY OF TORONTO



С 1/1-1961 года

Цена.....р. 5к.

50 к.

ДОНА ЧЕЛЯДЬ!

СУДЗӨДӨЙ ДА ЛЫДДӨЙ КНИГАЯС, КОДЪЯС-
ӨС ЛЭДЗИС КОМИ КНИЖНОЙ ИЗДАТЕЛЬСТВО:

*В. Лыткин (Илля Вась). ИДӨР-
ТӨМ СИДӨР. 1959 во, 16 стр., доныс
20 көп. Коми кыв вылын.*

*Р. Торбан. ЛЫМ МОРТ. 1959 во,
196 стр., доныс 3 шайт 50 көп. Коми
кыв вылын.*

*И. Василенко. РАССКАЗЪЯС.
1959 во, 104 стр., доныс 2 шайт 50 көп.
Коми кыв вылын.*

*Е. Рязанова. ТОМ КАД ЗАВОДИТ-
ЧИГӨН. 1959 во, 186 стр., доныс
4 шайт 10 көп. Коми кыв вылын.*

